

Naqqiut

Siunnersuut 7. marts 2017-imeersoq taarserlugu

§ 13, imm. 1 aamma 2 allanngortinneqarput aamma ulloq atuutilerfissatut siunnersuutaasoq allanngortinneqarpoq.

Uunga siunnersuut: Pisortani Digitalimik Allakkerineq pillugu Inatsisartut inatsisaat nr. xx, xx. xxx. 2017-imeersoq

Kapitali 1

Atuuffia aamma aaqqissuussinermut akisussaasoq

§ 1. Pisortani Digitalimik Allakkerineq tassaavoq Naalackersuisut allakkerisarnissatut innersuussaannut taaguut, tassungalu ilaapput pisortatigoortumik nassitsisut aamma inuit ataasiakkaat aamma inatsisit naapertorlugit ingerlatsiviit, allakkerisarnermut pinngitsooratik ilaasut imaluunniit namminneq piumassutsiminnik ilanngunnikut akornanni digitalimik attaveqatigiinnerit.

§ 2. Naalackersuisut aaqqissuussinermut akisussaasumik toqqaassapput, allakkerisarnerup ingerlanneqarneneranik isumaginnittussamik.

Imm. 2. Aaqqissuussinermut akisussaasutut toqqarneqarsinnaavoq pisortani oqartussa qarfik, imaluunniit suliffeqarfik namminersortoq.

Imm. 3. Aaqqissuussinermut akisussaasoq inuup normuinik suliaqarsinnaavoq, innuttaasut ilanngutitissinnaanissaat siunertarlugu, aamma allakkerisarnerup ingerlaavartumik ingerlanneqarnera suliarisinnaajumallugu.

Imm. 4. Inunnut paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu Peqqussummi § 35, inatsimmi matumani imm. 1 naapertorlugu inuup normuinik suliaqarnermut atuutinngilaq.

Kapitali 2

Pinngitsoorani ilanngunnissaq

§ 3. Inuit 15-inik sinnerlugilluunniit ukiullit Kalaallit Nunaanni najugallit, imaluunniit aalajangersimasumik tamaaniittut, allakkerisarnermut ilanngutissapput, inuk pineqartoq, §§ 5-7 naapertorlugit imaluunniit malittarisassat § 10 naapertorlugu aalajangersakkat malillugit, pinngitsoorani ilanngunnissaminut pisussaajunnaarsinneqarsimanngippat.

Imm. 2. Inatsisit naapertorlugit ingerlatsiviit, Qitiusumik Suliffeqarfinnik Nalunaarsuiffimmi (CVR) nalunaarsorneqarsimasut, Kalaallit Nunaanni angerlarsimaffillit, allakkerisarnermut ilanngutissapput, inatsisit naapertorlugit ingerlatsivik, §§ 8-9

naapertorlugit imaluunniit malittarisassat § 10 naapertorlugu aalajangersakkat malillugit, pinngitsoorani ilanngunnissaminut pisussaajunnaarsinneqarsimangippat.

Imm. 3. Inatsisit naapertorlugit ingerlatsiviit allagarsisarfinnik digitaliusunik, CVR-imi normorisamit allaanerusumik ilisarnaasikkamik pilersitsisinnaanerat pillugu Naalackersuisut malittarisassanik aalajangersaasinnaapput.

Imm. 4. Naalackersuisut malittarisassatigut aalajangersarsinnaavaat, imm. 1-imi aamma 2-mi taaneqartunit allaanerusunik Kalaallit Nunaannut pingaarutilimmik attuumassuteqarnerit, nassatarissagaat pinngitsoorani ilaalersitaaneq, inuk imaluunniit inatsisit naapertorlugit ingerlatsivik pinngitsoorani ilanngunnissaminut pisussaajunnaarsinneqanngippat.

Imm. 5. Inuk, imm. 1 malillugu ilanngunneqartoq, Kalaallit Nunaanni najugaqarunnaarpat imaluunniit aalajangersimasumik tamaaniikkunnaarpat, imaluunniit allatigut immikkut Kalaallit Nunaannut pingaarutilimmik attuumassuteqarunnaarpat, tak. imm. 4, ilanngussimaneq imm. 1-imi pineqartutut allannguuteqarani ingerlaannassaaq, pineqartoq pisussaajunnaarsinneqarnissamik qinnuteqanngippat. Pisussaajunnaarsinneqarnissamik qinnuteqarneq malittarisassat § 10 naapertorlugu aalajangersarneqartut malillugit pissaaq.

Kapitali 3

Nammineq piumassutsimik ilanngunneq

§ 4. Inuit aamma inatsisit naapertorlugit ingerlatsiviit, pinngitsoorani ilaanissamut pisussaajunnaarsinneqarnikut, nammineq piumassutsiminnik allakkerisarnermut ilanngussinnaapput, § 15-ip malitsigisaanik inatsisitigut atuuffeqartumik, atsiornermik digitaliusumik, allakkerisarnermik atuisinnaalersitsisumik pigisaqarunik.

Imm. 2. Inuk imaluunniit inatsisit naapertorlugit ingerlatsivik, nammineq piumassutsiminik allakkerisarnermut ilanngussimasoq, ilanngunnermut pituttorsimavoq, inuk imaluunniit inatsisit naapertorlugit ingerlatsivik, §§ 5-9 naapertorlugit imaluunniit malittarisassat § 10 naapertorlugu aalajangersakkat malillugit ilaanissaminut pisussaajunnaarseqqinneqarsinnaanngikkuni.

Imm. 3. Inuit 15-inik sinnerlugilluunniit ukiullit Kalaallit Nunaanni najugaqanngitsut imaluunniit aalajangersimasumik tamaaniinngitsut, allakkerisarnermut nammineq piumassutsiminnik ilanngussinnaapput § 15 malillugu inatsisitigut atuuffeqartumik, inuup normuanik tunineqarsimagunik aamma atsiornermik digitaliusumik, allakkerisarnermik atuisinnaalersitsisumik pigisaqarunik.

Imm. 4. Allakkerisarnermut pinngitsoorani ilanngunnissap atuutilernissaata tungaanut inuk imaluunniit inatsisit naapertorlugit ingerlatsivik, aalajangersakkani taaneqartuni ilaatinneqartoq, allakkerisarnermut nammineq piumassutsiminik ilanngussinnaavoq § 15 malillugu inatsisitigut atuuffeqartumik, atsiornermik digitaliusumik, allakkerisarnermik atuisinnaalersitsisumik pigisaqaruni.

Imm. 5. Inuit nammineq piumassutsiminnik ilanngutsitaanerat utertinneqarsinnaavoq, § 3, imm. 1-ip atuutilernissaata tungaanut, inatsisillu naapertorlugit ingerlatsiviit § 3, imm. 2-p atuutilernissaata tungaanut.

Imm. 6. § 3, imm. 1 atuutilerpat inuk pineqartoq pinngitsoorani ilaanissamik aaqqissuussinermut ilaalissaaq, pineqartoq kapitali 4-mi malittarisassat malillugit tamatuminnga pisussaajunnaarsinneqarsimangikkuni.

Imm. 7. § 3, imm. 2 atuutilerpat inatsisit naapertorlugit ingerlatsivik pinngitsoorani ilaanissamik aaqqissuussinermut ilaalissaaq, pineqartoq kapitali 4-mi malittarisassat malillugit tamatuminnga pisussaajunnaarsinneqarsimangikkuni.

Kapitali 4

Pisussaajunnaarsitsineq

§ 5. Inuit allakkerisarnermut pinngitsoorani ilanngunnissamut pisussaajunnaarsinneqarsinnaapput, pissutsit immikkut ittut, inuup allakkerisarneq atorlugu allagarsiassaminik tiguisinnaannginneranik kinguneqarsinnaasut atuuppata.

Imm. 2. Inummit, Kalaallit Nunaanni najugaqarunnaarsimasumit imaluunniit aalajangersimasumik tamaaniikkunnaartumit imaluunniit allatut pingaarutilimmik Kalaallit Nunaannut attuumassuteqarunnaarsimasumit pisussaajunnaarsinneqarnissamik qinuteqaat, tak. § 3, imm. 4, tamatigut pisussaajunnaarsinneqarnermik kinguneqartarpoq.

§ 6. Inuutissarsiornikkut ingerlassat pillugit attaveqaqatigiinnernut tunngatillugu, inuit allakkerisarnermut pinngitsooratik ilanngunnissaminnut pisussaajunnaarsinneqarsinnaapput. Pisussaajunnaarsitsineq pisinnaavoq pissutsit immikkut ittut, inuup allakkerisarneq atorlugu allagarsiassaminik tiguisinnaannginneranik kinguneqarsinnaasut atuuppata.

§ 7. Inuup allakkerisarnermut pinngitsoorani ilanngunnissaata pisussaajunnaarsinneqarnissaanik aalajangiineq kommunimi, inuup pineqartup Kalaallit Nunaanni inuit aqqisa allattorsimaffianni kingullertut nalunaarsorneqarfigisimasaani, kommunalbestyrelsemit aalajangiiffigineqassaaq.

Imm. 2. Inunnut kommunit avataanni inuit aqqisa allattorsimaffianni nalunaarsorneqarsimasunut, aamma inunnut Kalaallit Nunaanni najugaqartut, imaluunniit aalajangersimasumik tamaaniittut inuit aqqisa allattorsimaffianni nalunaarsorneqarsimangitsunut tunngasut Naalakkersuisunit aalajangiiffigineqassapput.

Imm. 3. Inuit inuutissarsiornikkut ingerlassaat pillugit attaveqaqatigiinnernut tunngatillugu, inuit allakkerisarnermut pinngitsooratik ilanngunnissamut pisussaajunnaarsinneqarnissaat, Naalakkersuisunit aalajangiiffigineqassaaq.

§ 8. Inatsisit naapertorlugit ingerlatsiviit allakkerisarnermut pinngitsooratik ilanngunnissaminnut pisussaajunnaarsinneqarsinnaapput, pissutsit immikkut illuinnartut inatsisit naapertorlugit ingerlatsiviit allagarsiassaminik digitaliusunik tiguisinnaannginnerannik kinguneqartut atuuppata.

Imm. 2. Inatsisit naapertorlugit ingerlatsivimmit Kalaallit Nunaanni suliffeqarfeqarunnaarsimasumit, imaluunniit allatut pingaarutilimmik Kalaallit Nunaannut

attuumassuteqarunnaarsimasumit, pisussaajunnaarsinneqarnissamik qinnuteqaat, tak. § 3, imm. 4, tamatigut pisussaajunnaarsinneqarnermik kinguneqartarpoq.

§ 9. Inatsisit naapertorlugit ingerlatsiviup allakkerisarnermut ilanngunnissamit pisussaajunnaartinneqarnissaanik Naalakkersuisut aalajangiissapput.

§ 10. Inuit aamma inatsisit naapertorlugit ingerlatsiviit allakkerisarnermut ilanngunnissamit pisussaajunnaartinneqarnissaannut malittarisassanik Naalakkersuisut aalajangersaassapput.

Imm. 2. Naalakkersuisut erseqqinnerusumik malittarisassaliorsinnaavaat, imm. 1 naapertorlugu aalajangiinerit allaffissornikkut oqartussaqaarfimmumt allamut ingerlateqqinneqarsinnaanngitsut.

Kapitali 5

Inuup allap allakkanik atuarsinnaaneramik pisinnaatitsineq

§ 11. Inuit aamma inatsisit naapertorlugit ingerlatsiviit, allakkerisarnermut ilanngussimasut, allakkerisarnikkut nalunaarutunik pineqartumut aamma pineqartumit nassiunneqartunik, allat atuarsinnaanerannik akuersisinnaapput, tamatuma pisinnaannginnera inatsisini allani aalajangersarneqarsimangippat.

Imm. 2. Inuit aamma inatsisit naapertorlugit ingerlatsiviit imm. 1-imi taaneqartumit allaanerusumik, allat allakkanik atuarsinnaanissaannik pisinnaatitsisinnaaneramat pillugu malittarisassanik erseqqinnerusunik Naalakkersuisut aalajangersaasinnaapput.

Kapitali 6

Pisortani Digitalimik Allakkerinerup atorreqarnera, aamma tamatuma inatsisitigut kinguneri

§ 12. Pisortatigoortumik nassitsisut allakkerisarneq atorlugu inuit aamma inatsisit naapertorlugit ingerlatsiviit, allakkerisarnermut ilanngussimasut, attaveqaqatigisinnaavaat, § 15 malillugu inatsisitigut atuuffeqartumik.

Imm. 2. Pisortatigoortumik nassitsisut allakkerisarneq atorsinnaanngilaat:

- 1) inatsit alla malillugu nalunaarut tigussaasunngorlugu imaluunniit allatut digitaliusumik nassiunneqartussaataappat, imaluunniit
- 2) tamanna § 16 malillugu aalajangersakkanut akerliuppat.

§ 13. Namminersorlutik Oqartussani kommuninilu pisortat oqartussaqaarfiisa tamarmik, allakkerisarneq pisortatigoortumik nassitsisutut atorsinnaavaat.

Imm. 2. Inatsisitigut immikkoortut, suliffeqarfiit, peqatigiiffiit il.il. erseqqinnerusumik nalunaarsorneqartut, pisortat ingerlatsiviisut naatsorsuutigineqarsinnaanngitsut, allakkerisarnermik pisortatigoortumik nassitsisutut atuisinnaanerannut malittarisassanik Naalakkersuisut aalajangersaasinnaapput. Tamannali taamaallaat atuuppoq ingerlatsinerannut aningaasartuutit annerusumik Namminersorlutik Oqartussanit kommunimilluunniit

akilerneqartarpata, imaluunniit inatsisikkut inatsisilluunniit naapertorlugit Namminersorlutik Oqartussat kommuniluunniit sinnerlugu aalajangiinissamut pisinnaaffilerneqarsimappata.

Imm. 3. Naalakkersuisut Inatsisartut Siulittaasuannik aamma Inatsisartut Ombudsmandiannik isumaqatiginninniareernikkut, Inatsisartut aamma taakku ataanni suliffeqarfiit allakkerisarnermik pisortatigoortumik nassitsisutut atuussinnaanerat pillugu malittarisassanik aalajangersaasinnaapput.

Imm. 4. Naalakkersuisut naalagaaffimmi oqartussanik isumaqatiginninniareernikkut, naalagaaffiup Kalaallit Nunaanni suliffeqarfiisa allakkerisarnermik pisortatigoortumik nassitsisutut atuisinnaanerit pillugu malittarisassanik aalajangersaasinnaapput.

Imm. 5. Naalakkersuisut Pisortani Digitalimik Allakkerineq aqutugalugu tamanut saqqummiutissavaat, pisortat oqartussa qarfiisa il.il. sorliit, allakkerisarneq pisortatigoortumik nassitsisutut atorneraat.

§ 14. Inuit aamma inatsisit naapertorlugit ingerlatsiviit allakkerisarnermut ilanngussimasut, allakkerisarneq pisortatigoortumik nassitsisunut attaveqateqarnermut atorsinnaavaat, § 15 malillugu inatsisitigut atuuffeqartumik.

Imm. 2. Inuit aamma inatsisit naapertorlugit ingerlatsiviit allakkerisarneq atorsinnaangilaat:

- 1) inatsit alla malillugu nalunaarut tigussaasunngorlugu, imaluunniit allatut digitaliusumik nassiunneqartussaataappat, imaluunniit
- 2) tamanna § 16 malillugu aalajangersakkanut akerliuppat.

§ 15. Nalunaarutit, allakkerisarneq atorlugu nassiunneqartut, isigineqassapput:

- 1) allaffigineqartumut apuussimasutut, piffissami allaffigineqartup allakkerisarnermi atuaasinnaangorfiani, aamma
- 2) nassitsisutut nalunaarneqarsimasumit nassiunneqarsimasutut.

Kapitali 7

Ilassutitut aalajangersakkat

§ 16. Naalakkersuisut allakkerisarnerup atornissaanut teknikkimut tunngasut pillugit malittarisassanik erseqqinnerusunik aalajangersaasinnaapput.

Kapitali 8

Atuutilersitsinermut- aamma ikaarsaarnermut aalajangersakkat

§ 17. Inatsisartut inatsisaat atuutilerpoq ulloq 1. januar 2018, taamaattorli tak. imm. 2-5.

Imm. 2. § 3, imm. 1-ip atuutilersinneqarnissaanut piffissaliusseq Naalakkersuisut aalajangersassavaat.

Imm. 3. § 3, imm. 2-p atuutilersinneqarnissaanut piffissaliusseq Naalakkersuisut aalajangersassavaat.

Imm. 4. Malittarisassat § 3, imm. 4 malillugu aalajangersarneqartut, inunnut pinngitsooratic ilannguttussanut, § 3, imm. 1-imi taaneqartut saniatigut Kalaallit Nunaannut allatut pingaarutilimmik attuumassuteqarnermit allaanerusumik tunngaveqartunut tunngasut, siusinnerpaamik atuutilersinneqarsinnaapput § 3, imm. 1-ip atuutilersinneqarneranut atatillugu.

Imm. 5. Malittarisassat § 3, imm. 4 malillugu aalajangersarneqartut, inatsisit naapertorlugit ingerlatsivinnut pinngitsooratic ilannguttussanut, § 3, imm. 2-mi taaneqartut saniatigut Kalaallit Nunaannut allatut pingaarutilimmik attuumassuteqarnermit allaanerusumik tunngaveqartunut tunngasut, siusinnerpaamik atuutilersinneqarsinnaapput § 3, imm. 2-p atuutilersinneqarneranut atatillugu.

Namminersorlutik Oqartussat, ulloq xx. xx 2017

Kim Kielsen